

SUMÁRIU KAZU

VIOLÉNSIA BAZEIA BA JÉNERU

Maiu 2014

Iha Maiu 2014, Unidade Justisa ba Feto no Labarik (*Women's and Child Justice Unit-WCJU*) kontinua monitoriza kazu violénsia bazeia ba jéneru iha jurisdisaun Tribunál Distritál Díli no Oe-cusse.

Iha edisaun ne'e, sumárizá kazu 23 ne'ebé julga iha tribunál sira iha leten. Kazu hirak ne'e konstitui 18 mak pertense ba Tribunál Distritál Dili no kazu 5 mak pertense ba Tribunál Distritál Oe-cusse.

Husi kazu 23 ne'e, kazu 16 klasifikadu nu'udar kríme ofensa ba integridade fízika simples ho natureza violénsia doméstika, kazu 2 klasifika ba kríme la halo tuir obrigasaun alimentár, kazu 3 klasifika ba krime maus tratus ba kónjuje no kazu 2 klasifikadu ba krime abuzu seksuál ba menór.

Entre kazu hirak ne'e, kazu 5 mak tribunál aplika suspensaun ba pena prizaun, kazu 2 aplika pena admoestasaun, kazu 3 kondena ho pena multa, kazu 2 kondena ho pena prizaun, kazu 11 seluk sei iha prosesu nia laran.

Iha kazu ne'ebé julga ho Nú. Prosesu 84/Crime/2014/TDO, tuir faktus husi akuzasaun konsta agresaun fiziku durante loron tolu tutuir malu, ne'e signífika tratamentu ladi'ak ba feen. JSMP hanoin katak tuir loloos ministériu públiku tenke asegura akuzasaun tuir faktus husi krime ne'ebé arguidu komete. Aleinde ne'e, tenke husu no eskolla pena ne'ebé apropiadu atu kontribui ba prevensaun krime hanesan iha futuru.

Iha parte seluk JSMP apresia kazu ne'ebé julga ho Nú. Prosesu: 644/2012/TDD tanba, alende kondena ho pena prizaun, tribunál inklui indemnizasaun ba vítima. Bazeia ba monitorizasaun JSMP durante ne'e nota katak normalmente tribunál la inklui indemnizasaun ba vítima. JSMP hanoin katak tuir loloos ba kazu sira hanesan ne'e, importante tebes atu fó reparasaun liu –husi indemnizasaun ba vítima tanba labarik no nia familia sofre husi arguidu nia hahalok.

Tuir mai deskripsaun sumáriu julgamentu kazu ida-idak:

### **1. Krime maus tratus ba kónjuje - Nú. Prosesu: 73/2014/TD Dili**

Kompozisaun Tribunál : Juis kolektivu

Juis : Dr. Duarte Tilman  
: Dr. Hugo da Cruz Pui  
: Dra. Zulmira da Silva  
Ministériu Públiku : Dr. Luis Hernani Rangel  
Defeza : Dr. Marçal Mascarinhas (defensória públiku)  
Konkluzau : Kondena arguidu ho pena prizaun fulan 6 suspende ba tinan 1 fulan 6.

Iha 2 Juñu 2014, Tribunál Distritál Dili prejide leitura akordaun ba kazu maus tratus ba kónjuje, ne`ebé involve arguidu PPdCC, iha Distritu Dili.

Ministériu Públiku akuza katak iha 12 Janeiru 2014, arguidu rakut lezada nia fuk, tuku iha rentos, hatudu liman fuan atu sukit lezada nia matan no dudu monu lezada ba rai. Aktu hirak ne`e rezulta lezada nia liman kona iha vidru rahun no hetan kanek. Kazu ne`e akontese tanba arguidu husu lezada atu halo relasaun seksuál maibé lezada lakohi.

Ministériu Públiku akuza arguidu kontra artigu 154 Kódigu Penál kona-ba maus tratus ba kónjuje.

Iha tribunál, arguidu konfesa no deklara katak faktus ne`ebé akuza ba nia ne`e loos hotu, arguidu mós arepende no deklara katak di`ak malu ona ho lezada. Iha parte seluk, lezada mós konfirma liu tan kona-ba faktu sira ne`ebé arguidu hatu`o ba tribunál.

Iha alegasaun finál, ministériu públiku alega katak arguidu provadu komete krime maus tratus ba kónjuje no husu ba tribunál kondena arguidu ho pena prizaun tinan 2 fulan 6 no suspende ba tinan 4.

Defeza argumenta katak kazu ne`e la prienxe elementu maus tratus ba kónjuje, tanba ne`e husu ba tribunál halo alterasaun juridiku ba fali krime ofensa ba integridade fízika simples tuir artigu 145 Kódigu Penál no fó pena ne`ebé kaman ba arguidu.

Depois avalia faktus provadus sira ne`ebé produz durante julgamentu, tribunál konsidera katak aktu ne`e la prienxe elementu maus tratus ba kónjuje. Tanba ne`e, tribunál halo alterasaun juridiku ba artigu 145 Kódigu Penál kona-ba ofensa ba integridade fízika simples no kondena arguidu ho pena prizaun fulan 6 suspende ba tinan 1 fulan 6.

## **2. Ofensa ba integridade fízika simples ho natureza violénsia doméstika- Nú. Prosesu: 101/2014/TD Dili**

Kompozisaun Tribunál : Juis singular  
Juis : Dra. Francisca Cabral  
Ministériu Públiku : Dra. Lidia Soares  
Defeza : Dr. Ruben de Carvalho (advogadu estajáriu)  
Konkluzau : Sei kontinua prosesu

Iha 15 Maiu 2014, Tribunál Distritál Dili, julga arguidu FS ne`ebé komete krime violénsia doméstika hasoru nia feen, iha Distritu Dili.

Ministériu Públiku akuza katak iha 19 Novembru 2013, arguidu tuku iha lezada nia hirus matan, kabas no rasta lezada nia fuk riba ba semente leten no rezulta lezada sofre bubu no moras iha hirus matan, kabas no ulun.

Kazu ne`e akontese tanba lezada husu osan ba arguidu atu lori sira nia oan ne`ebé moras hela ba konsulta, maibe arguidu dehan osan laiha.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 Lei Kontra Violénsia Doméstika.

Iha julgamentu arguidu konfesa no deklara katak faktus sira iha akuzasaun loos hotu no deklara katak nia arepende ninia hahalok no di`ak malu ona ho lezada.

Iha alegasaun finál, ministériu públiku konfirma katak arguidu provadu komete duni krime ne`e, nune`e, husu ba tribunál atu kondena arguidu ho pena prizaun fulan 6 suspende ba tinan 1.

Defeza argumenta katak arguidu konfesa, arepende nia hahalok no responsavel ba nia familia, tanba ne`e husu ba tribunál fo pena ne`ebé adekuadu.

Depois rona tiha alegasaun hosi parte sira, tribunál marka fali agenda ba leitura sentensa iha 10 Juñu 2014, iha tuku 15:00 lokraik.

### **3. Ofensa ba integridade fízika simples ho natureza violénsia doméstika- Nú. Prosesu: 95/2014/TD Dili**

Kompozisaun Tribunál	: Juis singular
Juis	: Dr. Zulmira da Silva
Ministériu Públiku	: Dr. Hipólito Santa
Defeza	: Dr. Laura Lay (defensória públiku)
Konkluzan	: Sei kontinua prosesu

Iha 15 Maiu 2014 Tribunál Distritál Dili, julga arguidu JSP ne`ebé komete krime violénsia doméstika hasoru nia inan, iha Distritu Dili.

Ministériu Públiku akuza katak iha 1 Marsu 2013, arguidu ho kondisaun lanu, basa lezada nia hasan no hodi katana ameasa lezada dehan atu oho lezada.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 Lei Kontra Violénsia Doméstika.

Iha julgamentu arguidu deklara katak nia tolok lezada maibé la basa no la ameasa. Maibe iha parte seluk, lezada kontinua reforsa katak arguidu ho lanu rasta nia fuk, basa nia hasan no ameasa duni nia.

Iha testamuña JSG nia depoimentu haktuir katak nia la hare arguidu basa no amesa lezada maibé bainhira testamuña hader husi toba fatin rona arguidu ho lezada istori-malu hela.

Iha alegasaun finál, ministériu públiku kontinua mantein nia akuzasaun no konfirma katak arguidu provadu komete krime hasoru lezada no husu ba tribunál kondena arguidu tuir krime ne'ebé nia komete.

Iha alegasaun defeza haktuir katak nia duvida ho provas ne'ebé produs durante julgamentu, tanba ne'e husu ba tribunál absolve arguidu.

Depois rona tiha alegasaun hosi parte sira, tribunál marka fali agenda ba leitura sentensa iha 30 Maiu 2014, tuku 2: 00 lokraik.

#### **4. Ofensa ba integridade fízika simples ho natureza violénsia doméstika - Nú. Prosesu: 145/2014/TD Dili**

Kompozisaun Tribunál	: Juis singular
Juis	: Dr. Antonio Helder do Carmo
Ministériu Públiku	: Dr. Hipolito Santa
Defeza	: Dra. Marcia Sarmiento (defensória públiku)
Konkluzau	: Kondena arguidu ho pena prizaun fulan 5 suspende ba tinan 2

Iha 16 Maiu 2014, Tribunál Distritál Dili julga arguidu JSV ne'ebé komete krime violénsia doméstika hasoru nia feen, iha Distritu Dili.

Ministériu Públiku akuza katak iha 26 Feveireiru 2012, arguidu fila husi servisu fatin ho kondisaun lanu, no tuku iha lezada nia tilun hun parte karuk no rezulta lezada oin nakukun no monu ba rai.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 Lei Kontra Violénsia Doméstika.

Iha julgamentu arguidu hili direitu nonok, no wainhira tribunál konfirma fali ba lezada ho testamuña AS kontinua reforsa faktu sira iha akuzasaun laran.

Lezada mós haktuir katak iha tinan 1999 arguidu mós baku lezada maibé la hato'o keixa, depoisde akontese fali iha Feveireiru 2012 ne'e, sira hela separadu too agora.

Iha alegasaun finál, ministériu públiku konsidera katak arguidu provadu komete krime ne'e, no husu ba tribunál kondena arguidu tuir gravidade husi krime ne'e.

Defeza mós konsidera katak faktu hotu-hotu provadu tuir depoimentu lezada no testamuña mesmu arguidu uza nia direitu nonok. Tanba ne'e, husu ba tribunál atu konsidera sirkunstansia atenuante arguidu nian no fó pena ne'ebé kmaan.

Depoisde avalia faktus provadus sira ne`ebé produz durante julgamentu, tribunál konklui prosesu ne`e no kondena arguidu ho pena prizaun fulan 5 suspende ba tinan 2.

### **5. Ofensa ba integridade fízika simples ho natureza violénsia doméstika - Nú. Prosesu: 219/2013/TD Dili**

Kompozisaun Tribunál : Juis singular  
Juis : Dr. Julio Gantes  
Ministériu Públiku : Dr. Amrozio Rangel  
Defeza : Dra. Marcia Sarmento (defensória públiku)  
Konkluzau : Kondena arguidu ho pena prizaun tinan 1 suspende ba tinan 2.

Iha 16 Maiu 2014, Tribunál Distritál Dili julga arguidu JdCS ne`ebé komete krime violénsia doméstika hasoru nia feen, iha Distritu Dili.

Ministériu Públiku akuza katak 17 Setembru 2012, arguidu tuku lezada nia hirus matan, tilun-hun no kotuk laran. Aktu ne`e rezulta lezada sofre moras no bubu iha hirus matan, tilun-hun no kotuk laran. Kazu ne`e akontese tanba lezada ba trata sertidaun RDTL no fila ba uma tarde.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 Lei Kontra Violénsia Doméstika.

Iha julgamentu arguidu konfesa integralmente faktus husi akuzasaun, deklara katak nia arepende nia hahalok no di`ak malu ona ho lezada. Tanba arguidu konfensa faktu sira, nune`e ministériu públiku husu atu la presiza rona tan lezada nia depoimentu.

Iha alegasaun finál, ministériu públiku haktuir katak arguidu konfesa, arepende ba nia hahalok no di`ak malu ona ho lezada, tanba ne`e, husu ba tribunál atu aplika suspensaun ba pena suspensaun durante tinan 2 ba arguidu.

Defeza konsidera arguidu hatudu kolaborasaun di`ak ho tribunál, manifesta nia arependimentu no di`ak malu ona ho lezada, nune`e, husu ba tribunál atu fo pena ne`ebé justu.

Depoisde avalia faktus ne`ebé mak produs durante julgamentu, tribunál konklui prosesu ne`e no kondena arguidu ho pena prizaun tinan 1 suspende ba tinan 2.

### **6. Krime maus tratus ba kónjuje- Nú. Prosesu: 432/2013/TD Dili**

Kompozisaun Tribunál : Juis koletivu  
Juis : Dr. Antonio Helder do Carmo (reprezenta juis koletivu)  
Ministériu Públiku : Dr. Jose Landim  
Defeza : Dr. Sergio Paulo Dias Quintas (defensória públiku)  
Konkluzau : Kondena arguidu ho pena prizaun tinan 3 suspende ba tinan 4.

Iha 22 Maiu 2014, Tribunál Distritál Dili prejjide leitura akordaun ba krime maus tratus ba kónjuje ne`ebé involve arguidu DdJP, iha Distritu Dili.

Ministériu Públiku akuza katak iha 25 Maiu 2013, arguidu tuku no tebe lezada nia isin lolon, no rezulta lezada sente isin moras no bubu. Iha 20 Juñu 2013, arguidu aperta lezada nia kakorok no ameasa lezada ho tudik atu sona mate lezada, tanba arguidu diskonfia lezada namora ho mane seluk. Aktu ne'e rezulta lezada sofre moras iha kakorok no sente trauma.

Ministériu Públiku akuza arguidu kontra artigu 154 Kódigu Penál kona-ba krime maus tratus ba kónjuje.

Iha julgamentu arguidu konfesa integralmente ba faktus iha akuzasaun, no kontiua reforsa liu tan hosi depoimentu lezada no testamuña. Mesmu nune'e, arguidu rasik deklara katak nia arepende ninia hahalok.

Depoisde avalia faktus provadus sira ne'ebé produz durante julgamentu, tribunál konklui prosesu ne'e no kondena arguidu ho pena prizaun tinan 3 suspende ba tinan 4.

## **7. Ofensa ba integridade física simples ho natureza violência doméstica - Nú. Prosesu :435/2013/TD Dili**

Kompozisaun Tribunál	: Juis singular
Juis	: Dra. Ana Paula Fonseca Monteiro
Ministériu Públiku	: Dr. Luis Hernani Rangel
Defeza	: Dr. José da Silva (defensória públiku)
Konkluzau	: Kondena arguidu ho pena prizaun tinan 1 suspende ba tinan 2.

Iha 22 Maiu 2014, Tribunál Distritál Dili julga arguidu TCMB ne'ebé pratika krime violência doméstica hasoru nia feen, iha Distritu Ermera.

Ministériu Públiku akuza katak iha 14 Maiu 2012, arguidu tuku lezada nia ulun, basa iha hasan, silu lezada nia liman no rezulta lezada nia isin sente moras no bubu iha ninia kotuk laran, ulun, hasan no liman naksalak. Kazu ne'e akontese, tanba lezada satan netik arguidu bainhira arguidu baku sira-nia oan.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade física simples konjuga ho artigu 2 no 35 Lei Kontra Violência Doméstica.

Durante julgamentu, arguidu konfesa no deklara katak faktus iha akuzasaun loos hotu. Arguidu mós deklara katak nia arepende nia hahalok no deklara katak sira di'ak malu ona. Tanba arguidu konfesa voluntariamente faktu sira ne'e, ministériu públiku husu atu la presiza rona tan lezada nia depoimentu.

Iha alegasaun finál, ministériu públiku haktuir katak arguidu provadu komete krime violência doméstica, tanba ne'e husu ba tribunál kondena arguidu ho pena multa.

Defeza konklui katak arguidu konfesa, arepende nia hahalok, di'ak malu ona ho lezada no laiha rendimentu atu kondena ho pena multa, tanba ne'e husu ba tribunál atu kondena arguidu ho pena admoestasaun.

Depoizde avalia faktus provadus sira ne`ebé produz durante julgamentu, tribunál konklui prosesu ne`e no kondena arguidu ho pena prizaun tinan 1 suspende ba tinan 2.

**8. Ofensa ba integridade fízika simples ho natureza violénsia doméstika - ho Nú. Prosesu: 154/2014/TD Dili**

Kompozisaun Tribunál : Juis singular  
Juis : Dra. Francisca Cabral  
Ministériu Públiku : Dra. Gloria Alves (prokuradora internasionál)  
Defeza : Dra. Laura Lay (defensória públiku)  
Konkluzau : Sei kontinua prosesu

Iha 27 Maiu 2014, Tribunál Distritál Dili julga arguidu MMS ne`ebé komete krime violénsia doméstika hasoru nia feen, iha Distritu Dili.

Ministériu Públiku akuza katak iha 18 Janeiru 2013, arguidu tuku lezada nia matan laran no tebe iha kotuk laran tanba lezada hader tarde no la prepara matabisu ba arguidu. Aktu ne`e rezulta lezada sofre matan bubu no kotuk laran sente moras.

Ministériu Públiku akuza arguidu kontra artigu 145 Kódigu Pénal kona-ba krime ofensa ba integridade fízika simples konjuga ho artigu 35 Lei Kontra Violénsia Doméstika.

Iha julgamentu arguidu konfesa no deklara katak faktus iha akuzasaun loos hotu. Mesmu nune`e, arguidu deklara katak nia arepende ninia hahalok no di`ak malu ona ho lezada.

Tanba arguidu konfesa faktus sira hotu, ministériu públiku husu ba tribunál atu la presiza rona tan lezada nia depoimentu.

Iha alegasaun ministériu públiku haktuir katak arguidu provadu komete krime violénsia doméstika tanba ne`e, husu ba tribunál atu aplika suspensaun ba pena prizaun durante tinan 1 atu halo prevensaun iha futuru.

Defeza haktuir katak arguidu konfesa faktus sira, arepende nia hahalok no responsabiliza ba familia, tanba ne`e husu ba tribunál atu aplika pena admoestasaun.

Depoiz rona tiha alegasaun hosi parte sira, tribunál marka fali julgamentu ba leitura sentensa iha 4 Juñu 2014 iha tuku 15:00.

**9. Ofensa ba integridade fízika simples ho natureza violénsia doméstika- Nú. Prosesu: 495/2013/TD Dili**

Kompozisaun Tribunál : Juis singular  
Juis : Dr. José Maria de Araújo  
Ministériu Públiku : Dra. Ivonia Maria Guterres  
Defeza : Dr. Fernando L. de Carvalho (defensória públiku)

Konkluzau : Sei kontinua prosesu

Iha 27 Maiu 2014, Tribunál Distritál Dili, julga arguidu MF ne`ebé komete krime violénsia doméstika hasoru nia feen, iha Distritu Aileu.

Ministériu Públiku akuza katak iha 13 Abril 2013, arguidu basa lezada nia hasan no tebe iha kotuk laran. Aktu ne`e rezulta lezada nia hasan no kotuk bubu no sente moras. Motivu husi akontesimentu ne`e, tanba lezada kastigu sira-nia oan ne`ebé sei kiik hak-neak iha semente leten.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 2 no 35 Lei Kontra Violénsia Doméstika.

Iha julgamentu arguidu konfesa no deklarata katak faktus husi akuzasaun ne`e loos hotu. Arguidu deklarata arepende nia hahalok, di`ak malu ona ho lezada no promete la repete hahalok ne`e iha futuru.

Tribunál konfirma ho lezada no lezada depoimenta katak, sira di`ak malu ona no lezada perdua ona arguidu nia hahalok ne`e.

Iha alegasaun finál ministériu públiku nian konfirma katak arguidu provadu komete krime violénsia doméstika, tanba ne`e, husu ba tribunál kondena arguidu ho pena prizaun fulan 6 suspende ba tinan 1.

Defeza konkorda ho alegasaun husi ministériu públiku, tanba arguidu kolabora di`ak ho tribunál hodi deskobre verdade.

Depois rona tiha alegasaun hosi parte sira, tribunál marka fali julgamentu ba leitura sentensa iha 11 Juñu 2014 iha tuku 15:00 lokraik.

## **10. Ofensa ba integridade fízika simples ho natureza violénsia doméstika- Nú. Prosesu: 570/2013/TDD**

Kompozisaun Tribunál : Juis singular  
Juis : Dr. José M. de Araujo  
Ministériu Públiku : Dra. Lidia Soares  
Defeza : Dr. José da Silva (defensória públiku)  
Konkluzau : Sei kontinua prosesu

Iha 27 Maiu 2014, Tribunál Distritál Dili julga arguidu CS ne`ebé komete krime violénsia doméstika hasoru nia oan feto, iha Distritu Ermera.

Ministériu Públiku akuza katak iha 12 Jullu 2012, arguidu lori sapatu tuda lezada nia kotuk, basa iha hasan no tebe iha ain. Agresaun ne`e rezulta lezada sente moras iha kotuk laran, bubu iha hasan no ain.



Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples konjuga ho artigu 35 Lei Kontra Violénsia Doméstika.

Iha julgamentu arguidu konfesa integralmente ba faktus husi akuzasaun, arepende nia hahalok no deklara katak sei la komete aktu hanesan iha future tantu hasoru lezada no ba ema seluk.

Iha alegasaun ministériu públiku nian konsidera katak arguidu kolabora ho tribunál hodi deskobre verdade, arepende no promete la komete krime hasoru lezada no ema seluk, nune'e, husu ba tribunál kondena arguidu ho pena prizaun fulan 6 suspende ba tinan 1.

Defeza konklui katak arguidu nia komportamentu di'ak no responsavel ba familia, nune'e, husu ba tribunál atu aplika pena admoestasaun.

Depoizde rona tiha alegasaun hosi parte sira, tribunál adia fali julgamentu ba leitura sentensa iha 10 Juñu 2014, iha tuku 15:00 lokraik.

### **11. Ofensa ba integridade fízika simples ho natureza violénsia doméstika- Nú. Prosesu: 237/2014/TD Dili**

Kompozisaun Tribunál	: Juis singular
Juis	: Dr. Antonio Helder do Carmo
Ministériu Públiku	: Dr. Hipolito Santa
Defeza	: Dra. Laura Lay (defensória públiku)
Konkluzau	: Kondena ho pena admoestasaun

Iha 28 Maiu 2014, Tribunál Distritál Dili, julga arguidu GFC ho nia feen HM ne'ebé komete krime violénsia doméstika hasoru arguidu nia feton, ne'ebé akontese iha Distritu Dili.

Ministériu Públiku akuza katak iha 24 Outobru 2013, arguidu GFC tuku lezada nia hirus-matan, tebe iha kidan, hodi sapatu tuda iha ulun no arguida HM rakut lezada nia fuk. Aktu ne'e rezulta lezada sofre moras no bubu iha hirus-matan, kidan, ho ulun. Motivu husi akontesementu ne'e, tanba lezada du'un arguidu sira-nia oan mak foti lezada nia sapatu.

Ministériu Públiku akuza arguidu no arguida kontra artigu 145 Kódigu Penál kona-ba krime ofensa ba integridade fízika simples konjuga ho artigu 2, 3 no 35 Lei Kontra Violénsia Doméstika.

Iha tribunál, arguidu no arguida konfesa no deklara katak faktus iha akuzasaun ne'e loos hotu, arepende ba sira nia hahalok no deklara katak di'ak malu ona ho lezada.

Aleinde ne'e, lezada hato'o depoimentu katak sira di'ak malu ona no perdua ona sira husi krime ne'e.

Iha alegasaun finál ministériu públiku haktuir katak tanba arguidu no arguida konfesa faktus no di'ak malu ona ho lezada, tanba ne'e, husu ba tribunál fo pena ne'ebé justu.

Defeza argumenta katak tanba sira konfesa, arepende sira nia hahalok, di'ak malu ona ho lezada no responsabiliza ba familia, tanba ne'e, husu ba tribunál fo pena ne'ebé kmaan ba arguidu.

Depoizde avalia faktus provadus ne'ebé produz durante julgamentu, tribunál konklui prosesu ne'e no kondena arguidu no arguida ho pena admoestasaun.

## **12. Ofensa ba integridade física simples ho natureza violéncia doméstika - Nú. Prosesu: 126/2014/TD Dili**

Kompozisaun Tribunál : Juis singular  
Juis : Dr. Antonio Helder do Carmo  
Ministériu Públiku : Dr. Luis Hernani Rangel  
Defeza : Dr. Fernando L. de Carvalho (defensória públiku)  
Konkluzau : Kondena ho pena admoestasaun

Iha 30 Maiu 2014, Tribunál Distritál Dili julga arguidu TDS ne'ebé komete krime violéncia doméstika hasoru nia feen, iha Distritu Ermera.

Ministériu Públiku akuza katak iha 23 Juñu 2013, arguidu foti ai-sanak ida baku iha lezada nia isin lolon tanba lezada fo etu maran ba arguidu. Aktu ne'e rezulta lezada sente moras iha nia isin lolon.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade física simples konjuga ho artigu 35 Lei Kontra Violéncia Doméstika.

Iha tribunál, arguidu konfesa integralmente ba faktus husi akuzasaun, arepende nia hahalok no deklara katak depoizde akontesimentu sira di'ak malu fali. Aleinde ne'e, lezada depoimenta katak sira di'ak malu ona.

Iha alegasaun ministériu públiku konfirma katak arguidu konfesa kona-ba faktu sira ne'ebé akuza ba nia, arepende nia hahalok no di'ak malu ona ho lezada, nune'e, husu ba tribunál atu aplika pena ne'ebé adekuadu ba arguidu.

Iha alegasaun defeza haktuir katak arguidu kolabora di'ak ho tribunál hodi deskobre verdade, arepende nia hahalok, primeiraves komete krime, tanba ne'e, husu ba tribunál atu aplika suspensaun ba pena prizaun ba arguidu.

Depoizde avalia faktus ne'ebé produs durante julgamentu, tribunál konklui prosesu ne'e no kondena arguidu ho pena admoestasaun.

## **13. Ofensa ba integridade física simples ho natureza violéncia doméstika- Nú. Prosesu: 75/Crime/2014/TDO**

Kompozisaun Tribunál : Juis singular  
Juis : Dr. João Ribeiro  
Ministériu Públiku : Dr. Alfonso Lopez

Defeza : Dr. Calisto Tout (defensória pública)  
: Dr. João Dun (advogado privado)  
Konkluzão : Sei continua processo

Iha 26 Maiu 2014, Tribunal Distritál Oe-cusse julga arguidu NC ne'ebé komete krime violénsia doméstika hasoru nia feen, iha Distritu Oe-cusse.

Ministériu Públiku akuza katak iha 15 Marsu 2014, arguidu basa iha lezada nia inus no kauza lezada nia inus moras no ran no tenke hala`o tratamentu iha PRADET kalan ida. Problema ne'e akontese tanba arguidu hamlaha no modo seidak tasak.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade física simples konjuga ho artigu 35 Lei Kontra Violénsia Doméstika.

Iha tribunal, arguidu konfesa integralmente ba faktus iha akuzasaun no deklara arepende no promete sei la halo tan iha futuro.

Ministériu Públiku husu atu la presiza rona tan lezada tanba arguidu konfesa integralmente ba faktus sira ne'ebé akuza ba nia.

Iha alegasaun finál, ministériu públiku haktuir katak arguidu provadu komete krime violénsia doméstika husu ba tribunal aplika pena adekua.

Defeza husu ba tribunal atu aplika pena ne'ebé justu ba arguidu tanba arguidu konfesa faktus, arepende ninia hahalok, responsavel ba nia familia no iha oan nain ualu.

Depois rona tiha alegasaun hosi parte sira, tribunal marka agenda julgamento ba leitura sentensa iha 9 Juñu 2014 tuku 10:00 dadeer.

#### **14. Krime la halo tuir obrigasaun alimentár ho natureza abandona familia- Nú. Prosesu: 80/Crime/2014/TDO**

Kompozisaun Tribunal : Juis singular  
Juis : Dr. João Ribeiro  
Ministériu Públiku : Dr. Alfonso Lopez  
Defeza : Dr. Calisto Tout (defensor público)  
: Dr. João Dun (advogado privado)  
Konkluzão : Sei continua processo

Iha 27 Maiu 2014, Tribunal Distritál Oe-cusse julga kazu krime la kumpri obrigasaun alimentár ba lezada ho oan ida, iha Distritu Oe-cusse.

Ministériu Públiku akuza katak iha 15 Maiu 2013, arguidu foti lezada nia roupa ba entrega iha lezada nia familia. Iha Juñu 2013 arguidu ba foti nia oan boot nain rua hodi hela ketak husi lezada ho sira nia oan ida kiik. Hahu fulan Jullu 2013, labarik bo`ot nai rua hela ho arguidu no

oan ida kiik hela ho inan (lezada). Arguidu ho lezada hela separadu kuaze tinan ida ona no arguidu la fó alimentus ba labarik ida kiik ho nia inan.

Ministériu Públiku akuza arguidu kontra artigu 225 Kódigu Penál kona-ba krime la halo tuir obrigasaun alimentár.

Iha akuzasaun haktuir mós katak antes arguidu nu'udar kondenadu husi Tribunál Distritál Oe-cusse tanba komete krime violénsia doméstika. Tribunál kondena arguidu ho pena multa US\$75.00 iha fulan Agostu 2013.

Iha julgamentu arguidu rekuza faktus sira iha akuzasaun, tribunál konfirma fali ho lezada no lezada depoimenta tuir faktus ne'ebé konsta iha akuzasaun. Arguidu mós deklarara iha audénsia katak nia pruntu hare labarik maibé nia hakarak divorsiu (fahe malu) ho lezada.

Testamuña LC ne'ebé nu'udar lezada nia maun deklarara katak lezada ho nia oan ida kiik hela ho testamuña, maibe nia laiha kbiit atu sustenta lezada ho nia oan, tanba limitasaun ekonomia ne'ebé nia iha.

Iha alegasaun finál ministériu públiku haktuir katak bazeia ba faktus ne'ebé produs, antesedensia kriminal arguidu nian, komportamentu ne'ebé abandona nia responsabilidade, husu ba tribunál aplika pena multa no husu arguidu responsabiliza ba lezada ho nia oan.

Defeza haktuir katak bazeia ba faktus sira ne'ebé produs, tuir kondisaun ne'ebé konfirma ba lezada ho testamuña, arguidu mós promete atu hare labarik sira, tanba ne'e husu ba tribunál aplika pena ne'ebé justu.

Depois rona tiha alegasaun hosi parte sira, tribunál marka fali julgamentu ba leitura sentensa iha 12 Juñu 2014, tuku 09:00 dadeer.

### **15. Ofensa ba integridade fízika simples ho natureza violénsia doméstika- Nú. Prosesu: 78/Crime/2014/TDO**

Kompozisaun Tribunál	: Juis singular
Juis	: Dr. João Ribeiro
Ministériu Públiku	: Dr. Alfonso Lopez
Defeza	: Dr. Calisto Tout (defensór públiku)
	: Dr. João Dum (advogadu privadu)
Konkluzau	: Sei kontinua prosesu

Iha 27 Maiu 2014, Tribunál Distritál Oe-cusse julga arguidu FT ne'ebé komete krime violénsia doméstika hasoru nia feen, iha Distritu Oe-cusse.

Ministériu Públiku akuza katak iha 29 Agostu 2013, arguidu ho lezada ba iha bairo Sono Masse tanba sanan la-to'o lezada sae motor ho ema seluk ba foti iha uma. Arguidu hirus tanba lezada la

fó hatene, sira fila ba uma arguidu basa dala rua iha lezada nia tilun hun ne'ebé kauza lezada sente moras no dezmaia.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples konjuga ho artigu 35 Lei Kontra Violénsia Doméstika.

Durante julgamentu, arguidu konfesa integralmente faktus iha akuzasaun, deklara katak primeiraves halo krime, diak malu ona ho lezada, arepende ba nia hahalok no promete sei la halo tan iha futuru.

Ministériu Públiku husu la presiza rona lezada tanba arguidu konfesa integralmente ba faktus iha akuzasaun.

Iha alegasaun ministériu públiku nian husu ba tribunál atu aplika pena adekuadu, nune'e bele prevene krime violénsia doméstika ne'ebé ass iha Distritu Oe-cusse.

Iha alegasaun defeza nian haktuir katak arguidu konfesa, arepende ninia hahalok, primeiraves halo krime, tanba ne'e husu ba tribunál aplika pena ne'ebé justu.

Depois rona tiha alegasaun hosi parte sira, tribunál marka fali julgamentu ba leitura sentensa iha 9 Juñu 2014 tuku 11:30 dadeer.

**16. Ofensa ba integridade fízika simples ho natureza violénsia doméstika- Nú. Prosesu: 84/Crime/2014/TDO**

Kompozisaun Tribunál	: Juis singular
Juis	: Dr. João Ribeiro
Ministériu Públiku	: Dr. Alfonso Lopez
Defeza	: Dr. Calisto Tout (defensór públiku)
	: Dr. João Dum (advogadu privadu)
Konkluzau	: Sei kontinua prosesu

Iha 28 Maiu 2014, Tribunál Distritál Oe-cusse julga arguidu JQ ne'ebé komete krime violénsia doméstika hasoru nia feen, iha Distritu Oe-cusse.

Ministériu Públiku akuza katak iha 14 Fevereiru 2014, arguidu basa dala ida iha lezada nia hasan karuk. Iha 15 Fevereiru 2014 arguidu kontinua basa tan dala ida iha hasan, no aktu hanesan kontinua tan Iha 16 Fevereiru 2014. Arguidu hasai lezada nia roupa soe arbiru no basa dala ida iha lezada nia hasan parte loos. Kazu ne'e akontese tanba diskuti-malu kona-ba osan fan tua-sabu nian.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples konjuga ho artigu 35 Lei Kontra Violénsia Doméstika.

Iha julgamentu arguidu konfesa integralmente ba faktus iha akuzasaun, tanba ne'e ministériu públiku husu atu la presiza rona depoimentu hosi lezada.

Iha alegasaun ministériu públiku nian haktuir katak arguidu provadu komete krime hasoru lezada hanesan sirkunstánsia agravadu, konfesa faktus, arepende ba hahalok no primeiravez halo krime, tanba ne'e husu ba tribunál aplika pena multa.

Iha alegasaun finál defeza nian, konklui katak arguidu konfesa faktus hotu, arepende ninia hahalok, iha ona konsiliasaun iha familia no la iha rendimentu, tanba ne'e husu ba tribunál aplika pena adekuaudu atu arguidu muda nia hahalok.

Despois rona tiha alegasaun finál hosi parte sira, tribunál marka fali agenda julgamentu ba leitura sentensa iha 13 Juñu 2014 tuku 09:00 dadeer.

**17. Krime la halo tuir obrigasaun alimentár natureza abandonu konjuga ho ameasa- Nú.  
Prosesu: 85/Crime/2014/TDO**

Kompozisaun Tribunál	: Juis singular
Juis	: Dr. João Ribeiro
Ministériu Públiku	: Dr. Alfonso Lopez
Defeza	: Dr. Calisto Tout (defensór públiku)
	: Dr. João Dum (advogadu privadu)
Konkluzau	: Sei kontinua prosesu

Iha 29 Maiu 2014, Tribunál Distritál Oe-cusse julga arguidu JM ne`ebé komete krime la kumpri obrigasaun alimentár, ne`ebé akontese iha Distritu Oe-cusse.

Ministériu Públiku akuza katak maizumenus iha Marsu 2013, arguidu husik hela lezada ba hola fetu seluk, durante tinan ida la fo osan no hahan. Sira tenta ona atu rezolve problema ne`e dala tolu iha xefe aldeia maibé arguidu la kolabora.

Ministériu Públiku akuza arguidu kontra artigu 225 Kódigu Penál kona-ba krime la halo tuir obrigasaun alimentar. Tribunál altera akuzasaun tuir artigu 157 Kódigu Penál kona-ba krime ameasa.

Iha 13 Fevereiru 2013 arguidu ba deve ema-nia osan US\$200 la selu, osan nain ba husu fali iha lezada, ho hirus lezada ba trata arguidu. Maibe iha momentu ne`eba arguidu nervozu hodi foti ai-bebak rohan hodi haruka lezada nonok se lae nia sei baku mate lezada.

Iha julgamentu arguidu deklara katak nia hola ona fetu seluk iha Maio 2013 no la fo hahan ba lezada maibé arguidu husik hela uma, karau 11, bibi 3, kios no hahan iha uma laran.

Iha julgamentu lezada rejeita alimentus husi arguidu no deklara katak husik arguidu moris ho feen kiik, lezada bele moris hakmatek.

Testamuña AE hato' o depoimentu katak hatene lezada ho arguidu istori-malu tanba osan US\$200 ne'ebé arguidu deve.

Iha alegasaun ministériu públiku nian husu tribunál absolve krime la halo tuir obrigasaun alimentár tanba faktus ne'ebé produz, lezada la presiza alimentus husi arguidu. Enkuantu ba krime amesa ministériu públiku husu tribunál aplika pena ne'ebé justu.

Iha alegasaun finál defeza nian, husu ba tribunál atu absolve arguidu ba krime la kumpri obrigasaun alimentár ho amesa tanba konsidera la provadu.

Depois rona tiha alegasaun finál hosi parte sira, tribunál marka fali julgamentu ba leitura sentensa iha 13 Juñu 2014 tuku 09:30 dadeer

**18. Ofensa ba integridade física simples ho natureza violência doméstica- Nú. Prosesu:  
246/2014/TDDIL**

Kompozisaun Tribunál	: Juis singular
Juis	: Dra. Ana Paula Fonseca
Ministériu Públiku	: Dr. Jacinto Babo
Defeza	: Dr. Marçal Mascarinhas (defensór públiku)
Konkluzaan	: Kondena ho pena multa

Iha 08 Maio 2014 Tribunál Distritál Dili prezide leitura sentensa ba arguidu SS ne'ebé komete krime violência doméstica hasoru nia feen, iha Distritu Dili.

Ministériu Públiku akuza katak iha 01 Abril 2011, arguidu tuku iha lezada nia matan fukun, basa iha hasan karuk no loos, ne'ebé rezulta ran sai husi inus no bubu iha matan. Iha momentu ne'eba, lezada grávida hela fulan 8. Motivu husi akontesimentu ne'e tanba lezada la gosta arguidu hemu tua lanu.

Ministériu Públiku akuza arguidu kontra artigu 145 Kódigu Penál kona-ba ofensa ba integridade física simples konjuga ho artigu 35 Lei Kontra Violência Doméstica.

Iha julgamentu arguidu deklarara ba tribunál katak faktus ne'ebé konsta iha akuzasaun loos hotu. Tanba ne'e, ministériu públiku husu atu la presiza rona deklarasaun husi lezada, tanba arguidu konfessa integralmente faktus sira iha akuzasaun.

Iha alegasaun ministériu públiku nian haktuir katak arguidu konfessa faktus sira hotu, tanba ne'e husu ba tribunál atu aplika pena multa ba arguidu.

Iha alegasaun finál defeza nian argumenta katak arguidu primeiraves komete krime no arepende nia hahalok, nune'e, husu ba tribunál atu aplika pena ne'ebé justu ba arguidu.

Depoisde avalia faktus hotu ne'ebé mak produs durante julgamentu, tribunál konklui no kondena arguidu ho pena multa US\$90.00.

**19. Krime ofensa ba integridade fízika simples ho natureza violénsia doméstika - Nú.  
Prosesu: 69/2014/TDDIL**

Kompozisaun Tribunál : Juis singular  
Juis : Dra. Ana Paula Fonseca  
Ministériu Públiku : Dra. Ivonia Guterres  
Defeza : Dra. Marcia Sarmento (defensória públiku)  
Konkluzasaun : Kondena ho pena multa

Iha 02 Maiu 2014, Tribunál Distritál Dili julga arguidu NdC ne`ebé komete krime violénsia doméstika hasoru nia feen, iha Distritu Dili.

Ministériu Públiku akuza katak iha 9 Maiu 2014, arguidu tuku iha lezada oin sorin karuk, tuku dala ida iha kotuk laran no buti iha lezada nia kakorok. Kazu ne`e akontese tanba arguidu sempre tama uma kalan boot, nune`e provoca sira diskute malu.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simple kónjuga ho artigu 35 Lei Kontra Violénsia Doméstika.

Iha julgamentu arguidu hili direitu nonok, wainhira tribunál konfirma ho vitima, no vitima deklara katak, akuzasaun husi ministériu públiku ne'e lo'os hotu.

Iha alegasaun Ministériu Públiku nian husu ba tribunál fó pena prizaun fulan 6 suspende ba tinan 1. Enkuantu, defeza husu ba tribunál atu aplika pena adekuaadu, justu no proporsionál.

Tribunál hato`o ba ministériu públiku no defeza kona-ba prazu desizaun, parte rua konkorda no presindi prazu (la presiza tempu) hodi halo kedas desizaun.

Depois rona tiha hosi ministériu públiku imediatamente tribunál konsidera katak faktus hotu provadu, tribunál deside kondena arguidu ho pena Multa US\$ 60 no selu kustu judisial US\$ 20.

**20. Krime ofensa ba integridade fízika simples ho natureza violénsia doméstika Nú.  
Prosesu: 558 /2013TDDIL**

Kompozisaun Tribunál : Juis singular  
Juis : Dr. Hugo da Cruz Pui  
Ministériu Públiku : Dra. Lidia Soares  
Defeza : Dr. José da Silva (defensória públiku)  
Konkluzasaun : Kondena ho pena multa

Iha 2 Maiu 2014, Tribunál Distritál Dili hala`o julgamentu ba krime violénsia doméstika ne`ebé komete husi arguidu SdJ hasoru nia feen, iha Distritu Ermera.



Ministériu Públiku akuza katak iha 9 Setembru 2013 arguidu lori kafe sanak baku iha lezada nia kotuk laran, ain ho liman nomos ko'alia liafuan maltrata hasoru lezada. Kazu ne'e akontese, tanba lezada la ba hare no kore bibi ne'ebé tali bobar hela.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simple kónjuga ho artigu 35 Lei Kontra Violénsia Doméstika.

Iha julgamentu arguidu konfesa katak di'ak malu ona ho lezada, arepende nia hahalok no promete la repete hahalok ne'e iha futuru.

Iha alegasaun ministériu públiku nian husu ba tribunál atu kondena arguidu ba krime ne'ebé nia komete nune'e bele hadia arguidu nia hahalok iha futuru. Iha parte seluk defeza husu ba tribunál kondena arguidu ho pena admoestasaun.

Depoizde avalia faktus hotu ne'ebé produs durante julgamentu, tribunál konklui prosesu ne'e no kondena arguidu ho pena multa US\$45.00

## **21. Krime maus tratus ba kónjuje -Nú. Prosesu: 76//2014/TDD**

Kompozisaun Tribunál	: Juis koletivu
Juis	: Dr. Duarte Tilman Soares
	: Dra. Jumiati Freitas
	: Dr. José Maria de Araujo
Ministériu Públiku	: Dra. Ivonia Guterres
Defeza	: Dr. Sebastião Amado Almeida (defensória públiku)
Konkluzsaun	: Sei kontinua prosesu

Iha 14 Maiu 2014, Tribunál Distritál Dili julga arguidu NdC ne'ebé komete krime maus tratus ba kónjuje, ne'ebé akontese iha Distritu Dili.

Ministériu Públiku akuza katak iha Jullu 2011, arguidu basa, tuku no tebe nia feen tanba wainhira to'o iha eskola atu tula fila nia feen ho oan ba uma, maibé sira laiha fatin. Tanba ne'e, arguidu ho hirus fila uluk mai uma. Iha 15 Setembru 2013, arguidu nervozu basa ,tuku, tebe, no rakut lezada nia fu'uk. Kazu ne'e akontese tanba arguidu tama uma kalan boot no sira diskute malu no la intende malu.

Ministériu Públiku akuza arguidu kontra artigu 154 Kódigu Penál kona-ba krime maus tratus ba kónjuje.

Iha julgamentu arguidu rekuza faktus iha akuzasaun no deklarata katak nia la rakut lezada fu'uk no la tebe lezada. Arguidu deklarata katak nia so basa de'it tanba ko'alia barak.

Wainhira tribunál konfirma ho lezada no lezada depoimenta katak, iha Jullu 2011 arguidu basa duni lezada no iha 15 Setembru 2014, arguidu fila kalan boot no sira diskuti malu, nune'e arguidu basa no tuku iha lezada nia kotuk laran.

Iha alegasaun ministériu públiku nian, husu ba tribunál fó pena prizaun tinan 1 suspende ba tinan 2 . Iha alegasaun defeza husu ba tribunál aplika pena adekuaadu, justu no proporsionál.

Despois rona tiha alegasaun final hosi parte sira, tribunál marka fali agenda julgamentu ba leitura sentensa iha 3 Juñu 2014 tuku 3 lokraik.

## **22. Abuzu seksuál ba menór - Nú Prosesu: 644/2012/TDD**

Kompozisaun Tribunál	: Juis koleтиву
Juis	: Dra. Ana Paula Fonseca : Dr. Hugo da Cruz pui : Dra. Zulmira da Silva
Ministériu Públiku	: Dr. Gloria Alves (prokuradora internasionál)
Defensór	: Dr. Rui Guterres (defensória públiku)
Desizaun	: Kondena arguidu ho pena prizaun tinan 8

Iha 5 Maiu 2014, Tribunál Distritál Dili prejide leitura akordaun ba kazu abuzu seksuál ba menór ne`ebé komete husi arguidu SM, iha Distritu Aileu.

Ministériu Públiku akuza katak iha 23 Setembru 2011, arguidu rasta no taka lezada nia ibun, kolu lezada nia rounpa hodi halo relasaun seksuál ho lezada. Arguidu aproveita lezada mesak ba kuru be`e iha posu ne`ebé dook husi uma. Aktu ne`e afeta ba saúde fíziku no psikolójika lezada nian.

Ministériu Públiku akuza arguidu kontra artigu 177 Kódigu Penál kona-ba abuzu seksuál ba menór.

Tribunál konsidera faktus hirak ne`e provadu tanba arguidu prátika duni abuzu seksuál, bazeia ba deklarasaun husi lezada no testemuña sira. Testamuña deklara katak sira hare arguidu halo relasaun seksuál ho lezada sira hase no hakilar, tanba ne`e arguidu tauk no halai.

Depoide avalia faktus provadu ne`ebé mak produz durante julgamentu no prosesu tomak ne`ebé asosiadu ho kazu ne`e, tribunál konklui no kondena arguidu ho pena prizaun tinan 8 no selu mós indemnizasaun ho valor US\$ 250.00.

## **23. Abuzu seksuál ba menór - Nú. Prosesu: 273/2014/TDD**

Kompozisaun Tribunál	: Juis koleтиву
Juis	: Dr. Julio Gantes (juis internasionál) : Dra. Fransisca Cabral : Dra. Zulmira da Silva
Ministériu Públiku	: Dr. Renato Bere Nahak
Defensór	: Dr. Sebastião Amado Almeida (defensória públiku)
Konkluzau	: Kondena arguidu ho pena prizaun tinan 8

Iha 30 Maiu 2014, Tribunál Distritál Dili prejide leitura akordaun ba kazu abuzu seksuál ba menór ne`ebé komete husi arguidu JM, ne`ebé akontese iha Distritu Dili.

Ministériu Públiku akuza katak 14 Janeiru 2014, maizumenus iha tuku 3 madrugada arguidu tama iha lezada nia kuartu hasai lezada nia roupa hotu, lori liman lamas lezada ne`ebé sei iha tinan 6 to'o arguidu hetan ezakulasaun.

Ministériu Públiku akuza arguidu kontra artigu 177 husi Kódigu Penál kona-ba abuzu seksuál ba menór.

Tribunál konsidera faktus hirak provadu, tanba arguidu deklara katak nia komete duni krime ne`e, hasoru vitima tanba momentu ne`ebá nia lanu.

Depoisde avalia faktus provadu sira ne`ebé mak produz durante julgamentu, tribunál konklui hodi kondena arguidu ho pena prizaun tinan 8.

Atu hetan informasaun kle'an liután favór kontaktu:

Luis de Oliveira Sampaio

Diretór Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

[info@jsmp.minihub.org](mailto:info@jsmp.minihub.org)

Telefone: 3323883|77295795 Website: [www.jsmp.tl](http://www.jsmp.tl)

Facebook: [www.facebook.com/timorleste.jsmp](http://www.facebook.com/timorleste.jsmp)

Twitter: @JSMPtl